

V E N D I M
Nr. 137, datë 22.2.2017

PËR PËRCAKTIMIN E KRITEREVE BAZË TË SEKTORËVE QË DO TË MBËSHTETEN DHE TË MASËS SË PËRFITIMIT NGA FONDI I PROGRAMIT PËR BUJQËSINË DHE ZHVILLIMIN RURAL, PËR VITIN 2017

Në mbështetje të nenit 100 të Kushtetutës, të pikës 3, të nenit 6, të ligjit nr.9817, datë 22.10.2007, “Për bujqësinë dhe zhvillimin rural”, dhe të ligjit nr.130/2016, “Për buxhetin e vitit 2017”, me propozimin e ministrit të Bujqësisë, Zhvillimit Rural dhe Administrimit të Ujërave, Këshilli i Ministrave

V E N D O S I:

1. Fondi i miratuar në buxhetin e vitit 2017 për Ministrinë e Bujqësisë, Zhvillimit Rural dhe Administrimit të Ujërave, zëri “Transferte në buxhetet familjare”, për mbështetjen e prodhimit bujqësor, blegtoral dhe të agropërpunimit, të përdoret për:

- a) investimet për rritjen e konkurrueshmërisë së produkteve për të garantuar furnizimin e qëndrueshëm të tregut;
- b) përmirësimin e teknologjisë së kultivimit dhe të mbrojtjes së bimëve;
- c) prodhimin e perimeve në ambiente të mbrojtura;
- ç) mbarëshkrimin e blegtorisë, bletarisë dhe akuakulturës;
- d) furnizimin e qëndrueshëm të tregut dhe rritjen e të ardhurave financiare për familjet e zonave rurale;
- dh) nxitjen e investimeve në sektorin e përpunimit, ruajtjes dhe marketingut të produkteve bujqësore, blegtorale, shpendëve, akuakulturës, mjaltit, dhe bimëve medicinale;
- e) rritjen e mundësisë së fermerëve për mjete të mekanizuara;
- ë) nxitjen e formalizimit, kooperimit dhe organizimit të shoqërive të bashkëpunimit bujqësor (SHBB).

2. Masat e mbështetjes dhe masa e përfitimit nga fondi i programit për bujqësinë dhe zhvillimin rural, sipas rajonizimit të hartës bujqësore e cila miratohet me udhëzim të përbashkët të Ministrisë së Financave dhe Ministrisë së Bujqësisë, Zhvillimit Rural dhe Administrimit të Ujërave, në shkallë vendi, të jenë, si më poshtë vijon:

a) Mbështetje për përmirësimin e teknologjisë së kultivimit e të mbrojtjes së bimëve, si:

- i. përmirësimi i teknologjisë së mbjelljes së vreshtave me fidanë të kultivarëve autoktonë, në vlerën 600 000 (gjashtëqind mijë) lekë/ha dhe me fidanë të kultivarëve të tjerë, në vlerën 500 000 (pesëqind mijë) lekë/ha;
- ii. përmirësimi i teknologjisë së mbjelljes së mollëve, dardhëve, kumbullave, qershive, pjeshkëve, nektarinave, fiqve, ftonjve, shegëve, kivit, manit, mjedrës, luleshtrydhes dhe agrumeve, në vlerën 200 000 (dyqind mijë) lekë/ha;

- iii. përmirësimi i teknologjisë së mbjelljes së arrave, lajthive dhe bajameve, në vlerën 200 000 (dyqind mijë) lekë/ha për format intensive të kultivimit;
- iv. përmirësimi i teknologjisë së mbjelljes dhe kultivimit të bimëve medicinale e aromatike, të kultivuara, si: lavanda, timus, rigon, rozmarinë, mëllagë e bardhë, mëllagë e zezë, valeriane, mollë e egër, tërfili i kuq, lule dielli (për petale), shafran (*Crocus sativus*) dhe *helichrysum italicum*, në vlerën 250 000 (dyqind e pesëdhjetë mijë) lekë/ha;
- v. mbështetja e fermave organike, në vlerën 200 000 (dyqind mijë) lekë për fermë të certifikuar;
- vi. përmirësimi i teknikave të ujitjes nëpërmjet instalimit të ujitjes me pika në ullishte, vreshta, pemëtore, agrume, arvore dhe shegë (vetëm për format intensive të kultivimit të tyre), kundrejt faturës tatimore, por jo më shumë se 250 000 (dyqind e pesëdhjetë mijë) lekë/ha, por financimi të bëhet për jo më pak se 0,5 ha dhe jo më shumë se 5 ha;
- vii. mbrojtja e ullishteve nga dëmtimi i mizës së ullirit në bllok dhe sipas zonave prioritare të prodhimit, me fond limit jo më shumë 35 000 (tridhjetë e pesë mijë) lekë/ha, përfshirë TVSH-në;
- viii. zëvendësimi i plastmasit për serrat, në vlerën 1 700 000 (një milion e shtatëdhjetë mijë lekë)/ha, me TVSH.

Sipërfaqja e mbjellë me kulturat e përshkruara sipas masave të përcaktuara në nënndarjet “i-iv” të kësaj shkronje duhet të jetë jo më e vogël se 0.2 ha dhe jo më e madhe se 5 ha.

b) Mbarësimi i blektorisë, bletarisë dhe akuakulturës, si:

i. mbështetja për mbarësimin e deleve dhe të dhive të matrikulluara, në vlerën 1 200 (një mijë e dyqind) lekë/krerë dele ose dhi, për fermat të cilat mbarështojnë jo më pak se 50 (pesëdhjetë) krerë, por financimi të bëhet për jo më shumë se 200 (dyqind) krerë, si më poshtë vijon:

- Për 100 krerët e para, masa e financimit deri në 100%;
- Nga 101 deri 200 (100 krerët e dyta), masa e financimit deri në 50%.

ii. mbështetja për fermerët me jo më pak se 50 koshere blete, por financimi të bëhet për jo më shumë se 200 koshere, si më poshtë vijon:

- Për 100 kosheret e para, masa e financimit deri në 100%;
- Për 101-200 koshere (100 kosheret e dyta), masa e financimit deri në 50%.

iii. mbështetja e sektorit të akuakulturës, në masën 25% të vlerës së rasiatit, por jo më shumë se 200 000 (dyqind mijë) lekë/fermë dhe 25% të vlerës së ushqimeve për peshkun nën kultivim, por jo më shumë se 100 000 (njëqind mijë) lekë/fermë, vërtetuar me faturë tatimore.

c) Furnizimi i qëndrueshëm i tregut dhe rritja e të ardhurave financiare për familjet e zonave rurale, si:

i. mbështetje për dorëzimin e prodhimit të frutave e të perimeve në pikat e grumbullimit ose përpunimit, në masën 15% të vlerës së mallit të shitur, të vërtetuar me faturë tatimore, përfshirë vlerën e tatimit. Sasia e dorëzimit të jetë për jo më pak se 100 kv dhe jo më shumë se 400 kv për frutat dhe perimet, si dhe për jo më shumë se 400 kv për fasulen pllaqi;

ii. mbështetje, në vlerën 10 (dhjetë) lekë/litri qumësht, për fermat blegtorale që mbarështojnë jo më pak se 10 (dhjetë) krerë lopë qumështi të matrikulluara, por financimi të bëhet për jo më shumë se 25 krerë dhe për jo më shumë se 2 000 litra për lopë. Pagesa të bëhet kundrejt sasive të qumështit të vërtetuara me faturë tatimore;

iii. mbështetje e fermave blegtorale që mbarështojnë në mënyrë ekstensive (regjim gjysmëstallor) lopë të matrikulluara, në vlerën 5 000 (pesë mijë) lekë për kerë, por financimi të bëhet për jo më pak se 10 krerë, si më poshtë vijon:

- Për 20 krerët e parë, masa e financimit deri në 100%;
- Për 21-30 krerë (10 krerët e tjerë), masa e financimit deri në 50%.

iv. mbështetje për dorëzimin e prodhimit të midhjeve në qendrat e grumbullimit dhe/përpunimit, në vlerën 10 (dhjetë) lekë/kg të dorëzuar (të shitur) e të vërtetuar me faturë tatimore, por financimi të bëhet për jo më pak se 200 (dyqind) kv dhe jo më shumë se 1 000 (një mijë) kv në vit.

ç) Nxitja e investimeve në sektorin bujqësisë, blegtorisë, shpendëve, bletarisë, akuakulturës dhe bimëve medicinale, si:

i. mbështetja e investimeve deri në 50% të vlerës së projektit, kundrejt faturës tatimore, përfshirë vlerën e tatimit, por jo më shumë se 20 000 000 (njëzet milionë) lekë për një subjekt, për:

- ngritjen dhe/ose rikonstrukcionin e ambienteve për grumbullimin, përpunimin dhe ruajtjen e produkteve bujqësore e blegtorale, produkteve të peshkimit e të akuakulturës, shpendëve dhe bimëve medicinale;
- ngritjen dhe/ose rikonstrukcionin e ambienteve për mbarështim të kafshëve, shpendëve, peshkut dhe molusqeve;
- linjat dhe/ose makineritë e pajisjet për standardizimin (paketim, mbushje, konservim, ambalazhim), tharjen dhe/ose përpunimin e prodhimeve bujqësore e blegtorale, mjaltit, bimëve medicinale, shpendëve, produkteve të peshkimit e të akuakulturës, si dhe për mjetet e specializuara të transportit për sektorët e sipërpërmendur;
- makineritë dhe pajisjet për mekanizimin dhe modernizimin e proceseve të punës në komplekset blegtorale, të shpendëve e të akuakulturës.

ii. ndërtimi i serave për kultivimin e perimeve, prodhimin e fidanëve dhe produkteve të tjera bujqësore, në masën 50% të vlerës së investimit, përfshirë vlerën e tatimit, si më poshtë:

- por jo më shumë se 700 000 (shtatëqind mijë) lekë për dynym, për sera me sipërfaqe minimumi 5 dynymë dhe jo më shumë se 2 ha për sera të thjeshta;
- por jo më shumë se 1 200 000 (një milion e dyqind mijë) lekë për dynym, për sera me sipërfaqe minimumi 5 dynymë dhe jo më shumë se 2 ha për sera të teknologjisë së përparuar.

3. Përfitues nga masat e mbështetjes dhe masa e përfitimit nga fondi i programit për bujqësinë dhe zhvillimin rural do të jenë fermerët, personat fizikë e juridikë dhe shoqëritë e bashkëpunimit bujqësor (SHBB).

4. Nga buxheti i miratuar për vitin 2017 të përdoret fondi me vlerë limit prej 35 000 000 (tridhjetë e pesë milionë) lekësh, për aktivitete informuese për publikun lidhur me masat e mbështetjes nga fondi i programit për bujqësinë dhe zhvillimin rural.

5. Projektet e vlerësuara, të verifikuara dhe të kontraktuara gjatë vitit 2016, të cilat janë shpallur fituese dhe nuk janë financuar plotësisht për shkak të vonesave në realizimin e projektit si pasojë e kushteve atmosferike apo vonesave të shkaktuara nga marrëdhëniet kontraktuale me të tretët ose autoritetet shtetërore, vonesa për të cilat është njoftuar autoriteti kontraktor, të paguhet me fondet e vitit 2017, brenda tremujorit të parë të vitit 2017, por jo më shumë se fondi i alokuar prej 80 000 000 (tetëdhjetë milionë) lekësh.

6. Projektet e vitit 2017, të cilat janë kualifikuar, por nuk mund të financohen për shkak të mungesës së fondeve, do të konsiderohen për financim nga shtesat e mundshme të buxhetit të vitit 2017.

7. Nga ky fond do të përdoret shuma 153 000 000 (njëqind e pesëdhjetë e tre milionë) lekë për bashkëfinancim me projektet IPA. Përdorimi i këtyre fondeve do të realizohet sipas marrëveshjes operationale të nënshkruar ndërmjet Ministrisë Bujqësisë, Zhvillimit Rural dhe Administrimit të Ujërave, AZHBR-së dhe Giz.

8. Ngarkohen Ministria e Bujqësisë, Zhvillimit Rural dhe Administrimit të Ujërave dhe Ministria e Financave për zbatimin e këtij vendimi.

Ky vendim hyn në fuqi pas botimit në “Fletoren zyrtare”.

KRYEMINISTRI

Edi RAMA